

मार्निंग डोगरी न्यूज़ बुलेटिन, समें. 09.20 Hrs

## Headlines

- जम्मू-कश्मीर विधानसभा नै खर्चे-अखराजातें सरबन्धी बिल ते जीएसटी संशोधन बिल पास करी दिते न।
- मुख सचिव अटल डुल्लु होंरें पीएम सूर्य घर मुफ्त बिजली योजना बारै जागरूकता बधाने दी जरूरतें पर जोर पाया ऐ।
- भारत नै पैहली स्वदेशी एम.आर.आई. मशीन विकसित कीती ऐ जिसी इस बरें अक्टूबर म्हीने दिल्ली दे एम्स अस्पतालें च स्थापित कीता जाहगा।
- जम्मू-कश्मीर च अज्ज ते कल दरम्याने दर्जे दी बरखा ते बर्फबारी दी मेद; मौसम विभाग नै केईं थाहें लेईं येलो अलर्ट जारी कीता ऐ।

<><><><><><>

## J&K Assembly

जम्मू ते कश्मीर विधानसभा नै कल 2 खर्चे ते अखराजात बिल पास कीते। एहदे कन्नै माली बरे 2024-25 ते 2025-26 सरबन्धी फंड हासिल करने च मदद होग। माली बरे 2024-25 ते 2025-26 लेईं खर्चे ते अखराजात सरबन्धी बिल मुखमंत्री हारें पेश कीते। दौनें गी ध्वनि मत कन्नै पास करी दित्ता गेआ। एहदे अलावा विधानसभा नै जम्मू ते कश्मीर बारै वस्तु ते सेवा कर संशोधित बिल गी बी ध्वनि मत कन्नै पारित कीता गेआ। एहदा मकसद केंद्र शासित

प्रदेश दे जीएसटी कनून गी केंद्रीय वस्तु ते सेवा कर सरबंधी कनून 2017 च कीते गेदे संशोधन मूजब बनाना ऐ।

<><><><><><>

### **Chief-Secretary**

मुख्य सचिव अटल डुल्लु होंरे पीएम सूर्य घर मुफ्त बिजली योजना दी केन्द्र शासित प्रदेश सतह दी तालमेल कमेटी दी कल इक बैठक लाई। इस मौके पर मुख्य सचिव होंरे इस योजना तैहत बद्धोबद्ध लाह हासल करने लेई लोकें गी मते शा मता जागरूक बनाने दी जरूरतें पर जोर पाया। उ'नें जम्मू ते श्रीनगर च बिजली दी बंडड सरबंधी कारपोरेशनें गी आखेआ जे ओह जमीनी सतह उप्पर तैनात अपने अमले गी, लोकें गी जागरूक बनाने दी जिम्मेदारी सोंपन। उ'नें सरबंधत अधिकारिणं गी इब्बी आखेआ जे ओह बिजली उपभोक्ताएं दा दिल बधान ते रिहायशी इमारतें उप्पर सौर उर्जा आहले पैनल स्थापित करने च उं'दा सैहयोग बी करन। मुख्य सचिव होंरे इस सरबंधे च ओकड़े लोकें दिणं कामयाबिणं दिणं कहानिणं गी सार्वजनिक करने दी जरूरतें पर जोर पाया जि'नें सौर उर्जा पैनल लोआने दे बाद अपने बिजली दे बिलें गी बड़ा मता घट्ट करने च कामयाबी हासल कीती ऐ। एहदे अलावा मुख्य सचिव होंरे लोकें आसेआ आवेदन दर्ज करोआने दे बाद तौले शा तौले इ'नें आवेदनें पर लोड़चदी कार्रवाई जकीनी बनाने दे बी निर्देश जारी कीते।

<><><><><><>

### **MRI-Machine**

भारत नै अपनी पैहली स्वदेशी एम.आर.आई मशीन विकसित करी लैती ऐ जिसी ट्रायल लेई अक्टूबर म्हीने तगर एम्स नर्मी दिल्ली च लाया जाग। इस पैहलकदमी दा मकसद इलाज मुआलजे दी कीमतें गी घट्ट करने दे कन्नोकन्नी बाहरले मुख्यें थमां मेडिकल सरबन्धी चीजें-बस्तें पर निर्भरता घट्ट करना ऐ कीजे इस्सलै 80 कोला 85 फीसद उपकरण बाहरले मुख्यें थमां औंदे न। इस्सै सिलसिले च भारत आसेआ तैयार कीती गेदी एमआरआई मशीन भारत गी मेडिकल टेकनालजी आहले खेतर च आत्मनिर्भर बनाने च मदाद देगं पत्रकारें कन्नै गल्ल करदे होई एम्स नर्मी दिल्ली दे डायरेक्टर एम. श्रीनिवास होरें आखेआ जे इस पैहलकदमी राहें बक्ख-बक्ख कंपनियें ते इदारें गी लोडचदे जरूरी बदलाव करने च मदाद करोग ते एह यकीनी बनाग जे दुनिया भरै थमां मुख्यै च सब्भनै शा बेहतरिन उपकरण होन।

<><><><><><>

## CM-Daily Wagers

मुख्यमंत्री उमर अब्दुल्ला होरें जम्मू च विरोध करारदे पीएचई कर्मचारियें गी अपना विरोध प्रदर्शन खत्म करने लेई आखेआ ऐ। उनें आखेआ जे सरकारै कर्मचारिएं गी पक्का कने सरबन्धी खाका तैयार करने लेई उच्च सतह दी कमेटी दा पैहले गै गठन करी दिते दा ऐ। बीजेपी आसेआ इस मामले पर सरकार दी प्रतिक्रिया देने आहली मंग पर बोलदे होई मुख्यमंत्री होरें आखेआ जे प्रशासन एहदा हल कड्डने लेई बचनबद्ध ऐ।

<><><><><><>

## Statehood-CM

मुकखमंत्री ओमर अब्दुल्ला होंरें जम्मू-कश्मीर दा राज्य दा दर्जा ब्हाल करने दी अपनी सरकार दी वचनबद्धता गी फही पक्का करदे होई इस गल्लै पर जोर पाया जे सियासी ड्रामेबाजी, मजूदा हकीकत गी बदली नेई सकदी। कल विधानसभा च इस बारे बोलदे होई ओमर होंरें राज्य दा दर्जा ब्हाल करने लेई उं'दे प्रशासन आसेआ कीते जा'रदे जतनें उप्पर लोs पाई ते दस्सेआ जे इस सरबंधे च उं'नें कैबिनेट च प्रस्ताs पास करने दे कन्नो-कन्नी प्रधानमंत्री होंरें'गी सिद्दी अपीलां बी कीतीआं न। उं'नें आखेआ जे जम्मू-कश्मीर उसलै तोहड़ी केन्द्र शासित प्रदेश गे बने दा रौहग जिच्चर भारत दी संसद आसेआ एहदा राज्य दा दर्जा ब्हाल नेई करी दिता जंदा।

<><><><><><>

### **DIG-Udh.**

जम्मू-कश्मीर पुलस नै सिविक एक्शन प्रोग्राम तैहत कई गेंs पुट्टियां न ते अपनी समाजी जिम्मेदारी निभाई ऐ। पुलस दे डीआईजी रईस मोहम्मद भट्ट होंरें इस सरबंधे च उधमपुर च आयोजित कार्यक्रम च बतौर मुख परौहने शिरकत कीती। इस दौरान उनें जरूरतमंद लोकें च व्हीलचेयर्स बंडडियां। इस मौके पर बोलदे होई डीआईजी रईस मोहम्मद भट्ट होंरें आखेआ।

<><><><><><>

### **Weather-Update**

मौसम विभाग नै अज्जै थवां 2 दिनें लेई जम्मू कश्मीर च दरम्याने दर्जे दी बरखा पौने दी पेशगोई कीती ऐ। किश थाहरें लेई विभाग आसेआ येलो अलर्ट बी जारी कीता गेआ ऐ। आकाशवाणी जम्मू संवाददाता दी रिपोर्ट मूजब मौसम विभाग नै अज्ज ते कल 2 दिनें लेई हल्की थवां दरम्याने दर्जे दी बरखा ते बर्फबारी होने दी पेशगाई कीती ऐ। विभाग नै जम्मू ते कश्मीर दी किश थाहरें लेई येलो अलर्ट बी जारी कीता ऐ। 28 मार्च थवां 3 अप्रैल तगर मौसम आम तौरा पर खुशक रौहग। विभाग नै यात्रुएं, सैलानिएं ते ट्रांसपोर्टरें लेई परामर्श जारी कीता ऐ जे ओह अपनी जातरा ट्रैफिक ते प्रशासन आसेआ जारी सलाह मूजब गै करन।

<><><><><><>

### **DC-Poonch**

पुंछ दे डिप्टी कमिशनर विकास कुंडल होरें औंदे ध्यारें जि'आं शब-ए-कदर, नरातें, ईद-उल-फितर ते बसाखी लेई तैयारिएं दा जायजा लैने गितै कल बक्ख-बक्ख मैहकमें, सिविल समाज दे प्रतिनिधिएं ते धार्मिक नेताएं कन्नै इक बैठक लाई। इस मौके उप्पर जेहड़े विशें उप्पर मुख करी चर्चा कीती गेदी उं'दे च साफ-सफाई सने, बिजली ते पानी दी सप्लाई, सुरक्षा सरबंधी हीले, ट्रैफिक प्रबंधन, मेडिकल सुविधां ते पार्किंग वगैरा दे बंदोबस्त मुख तौर पर शामिल हे।

<><><><><><>

### **Menstrual-Hygiene**

किशतवाड़ च महिलाएं दे सशक्तिकरण सरबंधी केन्द्र आसेआ मासिक धर्म सरबंधी साफ-सफाई पर केन्द्रित इक विशेष जागरूकता कार्यक्रम दा सरिस्ता कीता गेआ। इस मौके उप्पर सरबंधत टीम नै छड़ा महिलाएं लेई गै नेईं सगुआं पूरे समाज लेई मासिक धर्म सरबंधी स्वच्छता बारे जागरूकता बधाने दी जरूरतै उप्पर जोर पाया। इस चाल्ली दे कार्यक्रमें दा मकसद, महिलाएं गी

नियमित तौर उप्पर अपनी सेहत सरबन्धी जांच करोआंदे रौहने लेई जागरूक बनाना हा तांजे उ'नेंगी सेहत सरबन्धी कुसै बड्डी समस्या दा सामना नेई करना पवै। सरबन्धत टीम आसेआ महिलाएं गी इस मौके उप्पर सेहत सरबन्धी बक्ख-बक्ख विशें बारै जानकार बनाया गेआ जिंदे च परोआर नियोजन, मासिक धर्म सरबन्धी साफ-सफाई ते किशोर आवस्था दरान सेहत दिक्खभाल मुख तौर पर शामिल हे। एहदे अलावा प्रतिभागिं गी महिलाएं लेई चलाई जा'रदी योजनाएं बारै बी जानकार बनाया गेआ। कार्यक्रम दे अखीरै च महिलाएं गी मुफ्त सैनिटरी पैड बी बंड्डे गे।

<><><><><><>

## **Dy. CM**

उपमुखमंत्री सुरिंद्र चौधरी होरें कल जानकारी दिती जे प्रधानमंत्री विशेष पैकेज तैहत कश्मीरी विस्थापितें ते अविस्थापित कश्मीरी पंडितें लेई 6 जहार असामिं चा 5 जहार 868 पर नियुक्ति सरबन्धी आदेश जारी कीते गेन। एह गल्ल उपमुखमंत्री होरें एम.वाई तारीगामी हुंदे आसेआ विधानसभा च पुच्छे गेदे सोआलै दे परते च आक्खी। उनें दस्सेआ जे 2023-24 च 5 जहार 724 असामिं लेई आदेश दिते गे हे। उनें आखेआ जे 5 जहार 724 असामियां 2023-24 च जिस्सले कि इस माली बरे अजें तगर 144 असामियें लेई नियुक्ति सरबन्धी आदेश जारी कीते गेन, जिस्सले कि बाकी रौहंदी 132 असामिं गी पुर करने लेई प्रक्रिया बक्ख-बक्ख चरणें च ऐ।

<><><><><><>

## Social-Welfare Reasi

समाज कल्याण विभाग जम्मू दे ड़ैक्टर रूपेश कुमार होरें कल रियासी च समाज कल्याण विभाग दे बक्ख-बक्ख दफतरें ते इदारें दा दौरा लाइयै कल्याणकारी पैहलकदमिं गी तोढ़ चाढ़ने दे कम्मै दा जायजा लैने दे कन्नो-कन्नी समुदायें पर उं'दे प्रभाऽ दा आंकलन बी कीता। उं'दे इस दौरे दा मकसद खिते च गरीब ते कमजोर समूहें लेई मैहकमे दे कार्यक्रमें ते सेवाएं दी असरदार ढंगगै'नै अमल-आवरी जकीनी बनाना हा। इस मौके पर ड़ैक्टर होरें नमें सिरेया तैयार कीते गेदे दस्तकारिं सरबंधी केन्द्र दा दौरा लाया ते उत्थे सिखलाई हासल करै करदे लोकें कन्नै गल्लबात करियै आप सहायता समूहें दे गठन लेई उंदा दिल बधाया। एहदे अलावा उं'नें मुकामी समुदायें दिं बधदी मंगें गी पूरा करने लेई रियासी दे होरनें हिस्सें च बी इस्सें चाल्ली दे दस्तकारी केन्द्र खडेरने दी तजवीज़ कीती।

<><><><><><>

## DDC-Chairmen

जिला विकास काउंसल जम्मू दे अध्यक्ष भारत भूषण होरें जिले भरै च सब्भनें लौहकी नैहें ते कूहलें चा गार कड्डने ते उं'दी साफ-सफाई दे कम्में च हासल प्रगति दा जाजया लैने आस्तै कल इक बैठक लाई। कम्में दी मट्ठी रफतार उप्पर चैंता बुज्जदे होई डीडीसी अध्यक्ष होरें सरबंधत मैहकमें गी हिदायत दिती जे ओह इस प्रक्रिया च तेजी आहनन ते इक हफते दे अंदर-अंदर इ'नें कम्में गी सबूरा करोआना जकीनी बनान। उं'नें जमीनी सतह उप्पर आपसी तालमेल कन्नै कम्में गी तोढ़ चाढ़ने दी जरूरतें पर जोर पाया ते ग्रामीण विकास विभाग सने सिंचाई ते हाड़ें दी रोकथाम आहले मैहकमे दिं टीमें गी निर्देश दिते जे ओह सांझे तौर उप्पर निरीक्षण दे कम्में गी सबूरा करन। उं'नें आखेआ जे इ'नें निरीक्षण कन्नै, नैहें चा गार कड्डने ते साफ-

सफाई दे कम्मं च आवै करदी रूकावटें गी दूर करने च मदाद मिलोग। जिले दे बक्ख-बक्ख हिस्सें थमां करसानें ऑनलाईन इस बैठका च हिस्सा लैता ते इ'नें कम्मं गी लेइयें अपनियां चेंतां ते प्रतिक्रियां सांझी कीतीआं।

<><><><><><>